

# 《佛說堅意經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 17, No. 733

## No. 733

### 佛說堅意經

#### 後漢安息國三藏安世高譯

聞如是。一時佛在舍衛國。祇樹給孤獨園。佛告阿難。我今禪定。憐傷世人不知佛道正真弘深。而以淺偽輕薄之言。欲設嫉心謗毀道根。妄作窮難。難吾弟子。汝當正心知此罪人。或是邪妖惡師。或是不知世俗姦人。若諸菩薩。比丘僧比丘尼。優婆塞優婆夷。明經高潔。開解愚冥。為說生死罪福所鍾。設其即解知服道真。此為罪滅福生之人。若其指掌為說橋梁。心懷憤憤。意不欲聞。雖欲強聽。心多睡眠。或壞道法。輕毀沙門及優婆塞。惡口妄言。當明此人為罪所牽。沙門賢者。以忍為先。當如清水。無所不淨。死人死狗死蛇屎尿。亦皆洗之。然不毀水清亦當持心。有如掃箒掃地淨不淨。死人死狗死蛇屎尿。皆亦掃之。然不毀於箒矣。亦當復如風火之力光。死人死狗死蛇屎尿。亦吹亦燒然不毀風火之力光。若人欲來殺己。己亦不瞋。欲來謗己。己亦不瞋。欲來譖己。己亦不瞋。欲來笑己。己亦不瞋。欲來壞己使不事佛法。己亦不瞋。但當慈心正意罪滅福生。邪不入正。萬惡消爛。佛告阿難。其有好心善意之人。聞佛明法。一心而聽能一日可。不能一日。半日可。不能半日。一時可。不能一時。半時可。不能半時。須臾可。其福不可量。不可訾也。汝當廣為諸比丘僧比丘尼。優婆塞優婆夷。白衣人民說之。并當廣為說。布施種生死糧。其有齋日。施設飯食。請召四輩。高經賢者沙門道人。施設高座。論講佛經。燒香然燈。光明達天。諸天喜笑。皆下虛空。側耳來聽。莫不欣然。其有破慳。布施為福。善神即下營救門戶。攘禍滅怪。出與利會。利則而吉。終無怨惡。譬如種穀隨種而生。種善得福。種惡獲殃。未有不種而獲果實。當正爾心。福自歸身。慎無卜問。為邪所牽。心懷狐疑。善神遠人。動入罪地。所為不成。不知毀戒。反怨佛神。事之無益。遂不正心。男子女人。其有聞此經者。及奉持讀誦者。莫不得福者。佛說經已。阿難歡喜。起為佛作禮